

海門廳圖志十八

耆舊列傳下

海門耆舊可徵者前則有董氏日申嘉慶志彙後則有茅氏炳文師山詩存嘉慶志彙敘至嘉慶十二年止其襍出十二年以後者後人所增也師山詩存成於咸豐十年而集中諸小傳上溯乾嘉往往有出嘉慶志彙外者道咸兩朝則人物畧備今悉據以列傳其無事蹟可考及名見諸表者畧焉同光以來則采諸家誼牒及行述墓志總爲耆舊列傳下篇以孝行冠焉

沈鏘事祖母袁以孝聞父城卒三日不食旣殯啜麥醅居喪三年不入內室家人憫其毀瘠精粢覆麥屑進之拒不食母袁畏雷旣葬遇疾風迅雷必奔墓號泣病俗祭非禮參考古禮經及書儀家禮遵

大清會典定爲家祭儀節晚年輯族誼建宗祠箸祠規二十則子孫世守之

費洪周一名南度寄居通州川港鎮傭力供母主者犒肴果必懷歸奉母主者知之別潔肴果饋母而犒洪周如故則躡喜距躍耕作必倍數人以爲酬母疾日三四返視寒煥具食飲而傭作無廢事母病足畏寒嚴冬不能具爐火夜抱母足而煦噢之扶掖僂旋滌溺器濯穢汗二十年如一日道光某年先母卒遺言槩葬而以積傭資所置田屬族人善視其母母亦尋卒所居火什物皆盡獨母主無恙

人稱孝子靈感云

沈汝梅世錦曾孫事父榮高母張盡孝田不盈晦而食必精粢榮高生四子諸孫成行有酒肉必召而共罄之忘其子之貧汝梅妻王尤婉順榮高久疾佐汝梅嘗湯藥滌廁牖中裙終其身無倦色汝梅子某生數歲見母滌穢溺輒代煩擱之既長覩汝梅質衣供膳必傭力贖衣以衣父歲饑面有菜色而入侍父母怡怡無戚容父子純孝蓋出天性云汝梅兄占鰲附生究心儒先語錄以學行稱

袁自新字慎齋監生少失父母黃教之嚴鄰家客至邀自新爲菓子戲得錢百歸奉母母怒投錢池中而杖自新自是終身不復博事母色養備至母歿匍匐請旌入祀節孝海門廳圖志

卷十八

二

公祠每有司致祭歸率子弟奉木主薦饗三日以爲常家故貧而好施咸豐六年旱蝗發貧戶糧五十口戚友借貸晚年悉焚其券子葵仙有父風

李依義字方揆幼有至性母顧疾侍奉湯藥衣不解帶者數月父東高出游吳越間依義無遠近必隨侍跬步不離左右居喪哀毀逾禮從弟茂剛亦以孝行稱光緒十四年學使者長沙王公旌以南陔同咏匾額

石冠倫字靜山附生性至孝父疾篤冠倫惶懼偕婦割股和藥以進疾頓瘳天資穎異五經過目成誦暑夕納涼背誦歲徧以爲常

沈棻字敬南三歲識字十一通經傳大義中嘉慶甲子科

舉人選江浦縣教諭縣有江防堡三歲領帑一修而侈剝不治縣令屆期率僚佐行文報銷取充私囊棧至持不可弊遂革遷安徽潁上縣教諭暇輒偕令尹詣潁亭賦詩邦人傳詠性方鯁嚴禁書斗黃緣潁饒雞子枚直錢二弟子饋弗卻時以爲耆雞子云道光元年舉孝廉方正辭不就天性純篤旋里後杜門著書引掖後進疏宗舊戚故家遺孕困阨者與質假貸如弗及舅某坐事戍乾州粥產資其行少阨痘癘嘉猷療治獲痊終身父事之於師門尤厚卒門人私謚端敏學者稱雙溪先生著有雙溪草堂詩集古文襍箸哀輯師山人文三集刊行子熊燾熏

熊字笱邨附生幼有至性事祖母王以孝聞兄弟析產辭

海門廳圖志

卷十八

三

多受寡戚友告貸傾囊施予無吝色性寬和而持躬狷介晚署所居日織簾日手一編吟誦其中讀書課耕數十年足不履公庭同治元年以孝廉方正徵弟燾熏皆附生子廷坡附生

沈倬字秋槎附生績學工文歲科十試冠軍省試累薦不售道光二十九年重游泮水倬一時名宿門下多知名士晚年困頓場屋益肆力詩古文著有橫經堂全稿弟俊偉匯皆工詩兄弟倡和有四秋居士合稿子珠候選訓導珠子龍言廩貢生龍言子則桓附生從子則楊廩貢生則曾附生

秦一鳴字南江監生端直有氣局諳練世務與同里曹引

年陳琛擬建師山書院規模多出其手閒爲詩爲崇明黃懋曾父子所推重孫駕鰲廩貢生兆鵬舉人

陳琛字聘侯監生堂從子廳治草擬有大議聚訟盈廷琛徐出一二言折之論者翕服而退自溫克不以所長驕人既擬建書院同知梁蘭滋條邑典所闕次第興作琛皆贊成之從弟珣璟

珣字醫山監生意氣廓然所至驚其座人詩文有奇氣書畫俱臻逸品廳學初建偕同里龔照赴部請定學額士林頌之子陞和附生

璟字峙唐監生闊達豪邁譚辭如雲晚節一以詩古文爲業手少陵遺山二集豪吟疾諷往往顛越門限遺墮冠巾

海門廳圖志

卷十八

四

其風趣如此文宗樊川龍川著有梅心集

劉金煒字錫廷附生有幹才道光十年重建學宮在工出力議敘八品職銜書院草擬與同里楊依釐定章程綜覈款目井井有條船戶苦江埠勒索爲請於大府革除之人稱其傻子子驄恩貢生孫應標附生曾孫逢吉

逢吉字福疇廩生事祖母以孝聞性穎悟從祖子驄精研韻學逢吉童而習之子驄疾有所需口不能言拊掌示旨逢吉輒知之長益演闡其緒思有所著述未果同光之間訓導趙彭淵以敦品殖學倡導後進雅重逢吉才逢吉益自策厲所爲文和平中正不求異人人亦莫之及累試不第戊子省試歸發憤得疾卒子昌壽附生逾年亦卒逢吉

從弟逢丙附貢生

沈文裕字恪亭貢生道光十年同知周燾重建學宮遴文裕董其役挾貲庀材上下江甯蘇常閒會大風漂水沿江數百里文裕衝濤狂覓越八晝夜獲之屢瀕於危役成耗三千金議敘鹽運司知事沈栻選瀛海人文文裕命三子以蟾以順以誠校刊行世同時陳宗伯倡蠲千金助修文廟復蠲腴田千餘畝爲會試公車費士林稱頌

徐天柱字補齋寄居通境幼投鎮標水師由本營外委擢千總海盜張扣二案獲盜有功擢任掘港營都司又獲海盜王祥升狼山右營游擊洵升玉環營參將歿於任

楊朝棟字克齋父秀巖字玉峯崇明附生法吳范氏義莊海門廳圖志

卷十八

五

置義田數千畝以贍族人領建節孝公祠蠲田供春秋二

戊祭祀竝贍孤孀大吏奏聞奉旨嘉獎以子貴誥封昭武都尉年八十重游泮水鄉里榮之朝棟武生由崇明改歸海門中嘉慶庚辰科進士循例發往本省以外海水師用署楊舍營都司楊舍在江陰界初海盜張扣二據青草沙劫畧爲患朝棟出不意聞道入其巢擒盜梟申藍扣等十餘人扣二竄浙江移浙緝獲明年升署江甯城守補蘇鎮標奇營守備升補右營都司駐崇明黠盜二據洋山去崇明五百里營弁置盜不問而需索漁戶爲利藪朝棟嚴戢屬下捕盜首置之法道光六年升署蘇鎮標中營游擊防護海運是年巡洋至七山小洋

山獲鹽艘梟犯交部議敘旋署左營游擊母憂解職起復署奇營游擊巡外洋卒於任性耿介嫺詞翰出入重洋峻嶺皆有題詠居官稟劄檄令不假手他人子長春附貢生朝棟兄朝綱有孝行早卒弟朝鼎

朝鼎原名紀勳字作梅監生浙江候補通判歷署金華台州府通判衢州府同知至性過人嘗割股療親疾積三千善愿療兄疾道光十八年兄弟出私田千畝收租儲穀備水旱輔義田不逮居官廉謹在任清查錢漕辦理荒政吏不可干以私粵寇起遣子鏡涵投効大營而自課諸孫讀益博極經史工吟詠著有閑閑詩草

鏡涵字蓉初監生生而長身廣顙顧視有威咸豐初以府海門廳圖志卷十八
六
同知分發浙江丁憂回籍投効江北大營條陳金湯要畧三十事同治七年署温州府通判八年補處州府同知署知府在任勸課農桑著有廣蠶桑說勸農詩草爲政不務近名旣去而人思之嘗奉差南潯捐釐革除陋規潔己奉公爲時所稱子清鑑彙附生清照清泰入吳縣學

倪朱字正紫少通黃帝內外篇以治親疾遂精醫晚年偕里中諸子結詩社往來醅倡閒應當事之聘擊鉢喝韻簡落如飛箸有虛白齋詩集孫訥字穆廷再遷居皆以故居讓族之貧者訥子霽天敦內行子姓蘩盛

顧岑字天山學問淹博尤喜吟詠嘗訪隨園爲校刊其全集貨沃產數頃購近代諸名家詩文集以歸同時徐張維

亦以詩名爲知通州事唐仲冕所賞

宋大賓字裕昆附生性孝友教人以不欺爲本尤精易理嘗與同里沈棻剖析爻象疑義棻無以難箸作甚富歿後散佚

袁志筠字雪齋恩貢生幼居吳會壯游皖豫楚越閒與其賢士大夫游學問日淹貫凡將倉頡齊諧諾皋之書靡不研究數奇不遇坎壞以歿

龔雲路字南華敦品厲行言笑不苟居恆留心鄉邦文獻茅炳文輯師山詩存多資考證

郁亮儔字二枚道光癸卯舉人國子監助教早擅文譽詩清而腴出入石湖渭南箸有枕史閣吟草子閨同附生

海門廳圖志

卷十八

七

黃冠字善文精拳勇胸有奇氣喜作擘窠大字慕古劍俠裹糧訪道皖楚閒徧歷名勝有舟至錄一卷

黃河清字上理爲人忼爽有膽畧嘗徒步入都叩步軍統領衙門條陳漕運河務兵防鹽法諸弊洋洋數千言轉奏奉

旨交本省督撫查覆會江左被兵其事遂寢

黃文源字丕承監生居通境竹行鎮器識遠大英敏過人父紹楷一日見文源趨過而歎友人詰其故曰恐精明過流於刻薄耳文源聞言舉止失措自是隨事矯厲以長厚聞仲弟某出繼胞叔寡恆業與季弟文達各分己產畀之自乾隆迄咸豐遇歉歲必率先蠲振道光初年州境大水

米麥鬪貴或議告官請平糶文源曰救荒如救焚若拘文牽義則餓者填溝壑矣分遣海舶十餘赴直隸山東浙江沿海購襍糧減價出糶市價頓平居恆設局施醫藥棉衣爲人排難解紛費數千金不吝中年兄弟析產相讓年六十子孫稱觴文源曰汝輩爲吾壽吾亦爲汝輩造福乃出戚友借券數百紙一炬焚之身不讀而好誦

御批通鑑輯覽晚年積書至數萬卷子學璠最知名

學璠字芴田監生性耿介不隨俗浮沈道光十六年援例補山西甯武府經歷知府某不事事復縱子弟爲姦利學璠持之急積不相能會秩滿乞病歸時方壯人問勇退之故謝曰官卑旣無所設施祿薄又不足養親乃更卑躬屈

海門廳圖志

卷十八

八

節逢迎上官卯家居三十餘年養親課子之外手不釋卷閒應當事請籌辦團振事已絕足不至公庭性不喜治生產厭聞家人瑣事終日危坐言笑不苟興至賦詩作字有常課著有石華詩屋全彙子鉞世豐世泰

鉞字又芴廩貢生試用訓導忼爽能任大事同治初年捐輸案起紳士株連贓罰甚者頌繫鉞遇事持正獨不與公私歎異中年殂謝未竟其才

世豐附貢生繼鉞董捐輸三十年公私倚重廳有大工役當事必咨而後行才長肆應人人饜其意而不可干以私性通脫善譚諧尤精音律於南北曲宮調辨析入微天算有奇悟惜未卒業子廣禮附生

文達字鶴汀監生以孝聞紹楷莫年嬰痼疾鑿藥皆文達任之久遂知鑿道光中歲游饑以蠲振落其業大吏奏聞議敘翰林院孔目晚偕兄文源建宗祠修族誼置義塾並設局施鑿藥棉衣棺木至今人頌其惠弗衰子俊

俊原名學俊字少鶴幼溺苦於學邁寒疾既壯累試不第會粵逆將北竄憤然曰省會糜爛何以家爲悉以餘資助餉議敘縣丞旋奉檄籌辦通海江防敘功加六品銜同治初教民謀不軌事發多株連俊白其冤獲全者十餘家子世謙附貢生世豫從九品世頤

陳松泉一名磻溪字枕石監生幼攻舉業以家難中輟性能急人之急道光咸豐間歲游饑傾資蠲振全活甚衆議海門廳圖志

卷十八

九

敘八品銜粵匪之亂奉檄籌辦江防在事三年心力兼瘁敘功以同知候選晚歲晦居鄉里足跡不入城市而爲善益力士貧不能讀者恆資其膏火時人稱之子驥良武生孫寶琪廩貢生

茅景文字耳山監生鹽運司知事內行肫摯與人交不翕翕熱中年絕意仕進肆力於詩古文歌行才氣橫溢近體練意練句風格在大厯十子閒箸有八佩居吟橐子鉞監生鉞子宗洛附生早卒宗澤武生景文弟炳文

炳文字禹門貢生中書科中書承先志病廳學額隘率同志蠲助軍需增額二名精史學留心

本朝掌故晚輯師山詩存鄉邦文獻賴以表彰子錚仲元

叔元仲元附貢生

錚字鐵卿附貢生戶部郎中有幹才同列推重會粵匪陷蘇常請急歸省賊方揚聲北嚮炬火照江一夕數驚錚聯絡通海團勇以清內匪遠近帖然以事渡江陷於賊聞關得歸時前學使臨川李公挈家避兵依錚爲固一時江左名流聞風競趨所居成市焉年三十一遽卒士論惜之子宗瀚宗瀛紀庚方錚時同里劉其相字如玉亦練土勇相應以團防功議敘八品職銜會大府檄召團勇其相率從子元章以三百人應募敘功加六品頂戴同治二年捕會匪王朝揚有功以同知候選賞戴藍翎其相少時豪俠好義能急人之急晚年折節厲行恂恂如儒者子元震武生

海門廳圖志

卷十八

十

沈丙燧字藕雲附貢生試用訓導歷署海州學正清河縣訓導咸豐同治閒粵寇亟大府徵餉郡邑檄丙燧董理捐輸及開瀕海河渠洗手奉公人服其介所居麒麟鎮江南北避兵者麇集資其乏困謀其居處所全濟甚眾性好施善排難解紛里中化其行誼數十年無速訟者光緒三年舉鄉飲大賓子之瑛之瑾

之瑛字廉江增貢生兵部主事簽分車駕司行走故事貲郎非優敘白首不得補官之瑛泊然無所營益沈滯會江左被兵以親老乞假自膠州杭海歸遂不復出性剛正會遘家難悲憤填膺歿之日歐血數口徐飲酒覆楮而絕聞者哀之

黃儒字南塘監生所居三陽鎮距廳治遠生童應書院課不及赴期會道光初率同志勸建東洲課院按期課試子弟數十人角藝恆至午夜一燭未脫秉燭危坐以俟寒暑無閒士林感奮所成就甚眾生平勇於爲善嘗蠲建義塾出貲代輸童試印結費子孫承其志不廢孫錫齡廩貢生徐雲錦字石漁恩貢生候選教諭先世居侯家油榨母戴守節撫孤事具列女表雲錦十五而廢學旣遷常樂鎮母令鉏棉烈日中不堪其苦慨然曰此非吾所爲乃白母從崇明黃晴谷游晝覆誦所遺書夜帷炬讀且讀且究其義學大進旣補廳學生貢太學稍以章句教授弟子從受業各量才所受爲淺深高下前後五十年成就以什百計性

純孝母病刲股和藥者再母歿歲時祭祀述先世遺事母氏苦節狀輒悲哀流涕外和而內介每出游乘小車遇道稱先生者無少長必爲之下後生小子一行藝可錄稱道弗去口顧獨不可干以私光緒元年以孝廉方正徵辭不就十八年年七十八卒門人私謚孝懿爲學不立門戶而無所不通尤沈潛先儒傳疏中年手輯漢唐人舊注密行細字累數寸先是歲常一溫其所習易詩書三禮左氏春秋論語孟子將歿之前一年手校十二經誤文益劬通周秦諸子至管子七十篇躋駿難治坐誦行思之逾月得咯血疾遂卒其精勤如此所著寸草廬全彙未刊行子七彰吉孚吉最知名

李之香字笑春附生爲文務融會傳疏精蘊劇腎鉅肝而出以平易故若不經意而驟難索解中年得奇疾見人識其名而口不能言論事舉其端而不能畢其辭蓋心血耗矣數年尋卒從弟兆彪字寅谷工詩箸有夢華館詩草累試不售亦早卒

張玉堂字少軒增生祖至剛父榮累世好施玉堂性嚴毅所居張家沙近鹽場大使某議增賦禮請玉堂冀得一言爲重使再三返卒不赴事竟不行歲饑倡蠲給貧戶錢粟不足則稱貸益之全活甚眾天性孝友居母辭弟玉田玉庭喪哀毀過禮構心疾旋卒子應昌附生

袁淮字匯沂恩貢生性質直與兄江友愛甚篤然語不合

則反唇相稽旋涕泣自搥而復故終身未嘗析產爲文語練而氣舒體峻而韻長有名於時從子熾廩貢生煥附生姚應春字純夫附生工書法出入西臺南宮自闢町畦縱橫奔放而不失繩墨時無知者惟同里曹謙深奇之晚年通達醫理治證不墨守古方而多奇驗旁涉音律篆刻冥搜神契妙造精微性狷介取與不苟累試不第卒門人私謚端介先是應春性不諧俗而書體險怪時稱姚怪曹謙亦工書而尤推重應春每相見必極笑爲樂時稱曹癡以相偶云謙字馥棠隱於酒同時樊應奎附生亦以能書名龔日孜字少文附生父煌長洲縣訓導由崇明改歸廳籍日孜天性渾厚氣度凝然不見喜愠之色尚義而好施處

境早豐晚嗇夷然一致先後董理文廟書院公車賓興諸公田歲徵租給用或恣侵欺置不校黠者知其然益乘機乾沒頗以是滋校議卒未嘗自明習知先代掌故好談論古今異聞軼事語或駭俗輒芻援他事年月可徵者參錯傳會以證其然引端申緒聽者忘倦子其偉恩貢生

黃景仁字厚菴增生光緒初元舉孝廉方正考授州判少治經訓而制舉文不中程度累躋童試學使者臨川李公按試通屬激賞之由是知名景仁爲人沈毅而樸愿布袍羶冠煦煦若村夫顧能任大事地方善舉及大工役當事誣諉罔弗應歷任同知倚重焉先是頗爲人解紛爭稍居閒言事赴愬者眾所居門閭田塍閒纍纍相屬坐則晤於海門廳圖志 卷十八 三

室行則晤於塗出游則晤於逆旅極人情所難堪而景仁饑不食渴不飲與牧豎伍伯襍坐瑣瑣作村媪語窮日夜無倦色晚年受制廳胥與正士異趣時論惜之子師琦附生

張雲搏字子紳副貢生家素封以重幣延師落其業既補廳學生益發憤自厲勇於任事急人之急如水火兄弟匱乏者疏宗遠戚不能自存者喪葬不能舉者皆取給雲搏負累不能勝則去而從軍於朝鮮於金州旅順軍中築礮壘拋綫取準推算一用西法雲搏稍究其術遂能以方里測繪歸而博考經世之書斬大用會授徒江甯得疾卒黃大塊性孝友父歿異母弟四人教養皆成立讀書不應

試以五經章句教授里中剖析疑滯人服其精家世力田
大塊率諸弟躬畊辨土性之宜時其播殖晦不加多而歲
穫倍豐鄰畔以爲法廳人健訟大塊遇事退讓終身足不
至公庭人亦莫敢干晚年安貧樂道囂囂昧晦之中而無
所求人稱隱君子子維衡教之讀而戒勿仕進其旨趣如
此